

Cyfle i Ddweud eich Dweud am Ysgol Newydd

Mae Cyngor Sir Penfro yn mynd i ymgynghori â'r cyhoedd ynghylch y bwriadau sydd gydag e i gael ysgol newydd yn Aberdaugleddau.

Mae'r Cyngor yn dymuno adeiladu ysgol gynradd newydd ar gyfer Hakin a Hubberston.

Byddai'r ysgol newydd yn disodli'r ysgolion presennol, sef Ysgol Gynradd WR Hubberston ac Ysgol Gymunedol Hakin, sydd ar hyn o bryd wedi'i lleoli ar ddau safle.

Fe gyflwynwyd y cynnig hwn ar ôl i'r Cabinet roi sêl ei fendith ar argymhelliad a wnaed gan y Cyfarwyddwr Plant ac Ysgolion i adolygu darpariaeth ysgolion cynradd yn yr ardal.

Mae'r adolygiad hwn yn digwydd yn sgil ymgynghoriad cychwynnol a gynhaliwyd ym mis Mehefin a mis Gorffennaf eleni.

Bydd dogfen ymgynghori ynghylch y cynlluniau ar gyfer yr ysgol newydd, ar gael i'w gweld ar wefan y Cyngor yn ddiweddarach y mis yma. Wedyn, y mis nesaf, fe gynhelir dwy sesiwn galw heibio ar gyfer y cyhoedd.

"Mae'n ddyletswydd statudol ar y Cyngor sicrhau bod lleoedd digonol ac addas ar gael yn ei ardal. Rhaid iddo hefyd benderfynu a yw e'n defnyddio'i adnoddau a'i gyfleusterau yn y modd gorau er mwyn darparu'r cyfleoedd y mae plant yn haeddu eu cael," meddai'r Cynghorydd Ken Rowlands, yr Aelod Cabinet dros Addysg.

"Bwriad ein cynnig yw hybu darpariaeth addysg trwy ddarparu amgylchedd dysgu modern ar gyfer ein plant. Trwy fanteisio ar gryfderau'r ddwy ysgol bresennol rydym hefyd yn dymuno gwella rhagor ar safonau cyrhaeddiad y disgyblion."

Ysgol Wirfoddol a Reolir yr Eglwys yng Nghymru fyddai'r ysgol newydd hon, a byddai'n darparu addysg ar gyfer hyd at 480 o ddisgyblion, 3-11 oed. Byddai hefyd yn cynnwys Canolfan Adnoddau Dysgu ar gyfer disgyblion ag anghenion cymhleth, a gallai'r ganolfan hon dderbyn 24 disgybl.

Ar ben hynny i gyd efallai y bydd modd darparu cyfleoedd ar gyfer addysg oedolion a chyfleoedd i'r gymuned drwyddi draw ddefnyddio'r adeilad, sydd wrth gwrs yn fanteision bendigedig.

Mae rhagor o fanylion y cynnig i'w gweld yn y ddogfen ymgynghori a bydd hi ar gael ar wefan y Cyngor o ddydd Llun 25 Tachwedd 2013 hyd ddydd Llun 6 Ionawr 2014. Bydd y ddogfen ar gael yn www.pembrokeshire.gov.uk/haveyoursay

Mae croeso i fuddgyfranogwyr hefyd fynd draw i'r sesiynau galw heibio a gynhelir o 6.30 - 8pm ar ddydd Mercher 4 Rhagfyr yn Ysgol Gynradd Gymunedol Hakin ar Waterloo Road, a dydd Iau 5 Rhagfyr yn Ysgol WR Hubberston.

Bydd Pennaeth Addysg Cyngor Sir Penfro yn rhoi cyflwyniad byr am 7pm fel rhan o'r sesiynau.